

Garis Panduan

SIRI 2



**GARIS PANDUAN
KHURAFAT
& AZIMAT**



**GARIS PANDUAN
PERBOMOCHAN
MENURUT ISLAM**



**GARIS PANDUAN
SILAT
MENURUT ISLAM**



**GARIS PANDUAN
ORANG ISLAM TURUT
MERAYAKAN HARI
KEBESARAN AGAMA
ORANG BUKAN ISLAM**

Garis Panduan

S I R I 2



GARIS PANDUAN

**KHURAFAT
& AZIMAT**



GARIS PANDUAN

**PERBOMOHAN
MENURUT ISLAM**



GARIS PANDUAN

**SILAT
MENURUT ISLAM**



GARIS PANDUAN

**ORANG ISLAM TURUT
MERAYAKAN HARI
KEBESARAN AGAMA
ORANG BUKAN ISLAM**

Cetakan Pertama 2015

Hakcipta terpelihara. Tidak dibenarkan mengeluarkan ulang mana-mana bahagian penerbitan ini dalam apa jua bentuk yang boleh diperolehi semula atau disiarkan dalam bentuk dengan apa cara, elektronik, mekanikal, fotokopi, rakaman @ sebaliknya tanpa mendapat keizinan daripada penerbit.

Susunan:
Bahagian Fatwa
Jabatan Mufti Negeri Pulau Pinang
<http://mufti.penang.gov.my>

Diterbitkan oleh:
Jabatan Mufti Negeri Pulau Pinang
KOMTAR, Tingkat 48,
Georgetown 10000,
Pulau Pinang
Tel: 04-263 2975 Faks: 04-263 2985

NASKAH PERCUMA

kandungan

ms 01



**GARIS PANDUAN
KHURAFAT & AZIMAT**

ms 11



**GARIS PANDUAN
PERBOMOCHAN MENURUT
ISLAM**

ms 21



**GARIS PANDUAN
SILAT MENURUT
ISLAM**

ms 29



**GARIS PANDUAN
ORANG ISLAM
TURUT MERAYAKAN
HARI KEBESARAN AGAMA
ORANG BUKAN ISLAM**

Garis Panduan

SIRI 2



GARIS
PANDUAN

**KHURAFAT
& AZIMAT**

MAKLUMAT FATWA RASMI

Garis Panduan Khurafat dan Azimat ini telah disemak oleh Panel Kajian Aqidah dan diluluskan oleh Jawatankuasa Fatwa Majlis Kebangsaan Bagi Hal Ehwal Agama Islam Malaysia.

TUJUAN

Garis Panduan ini disediakan untuk memberi pendedahan kepada masyarakat mengenai bahaya kepercayaan terhadap khurafat dan azimat yang boleh menggugat akidah seseorang. Panduan ini adalah berdasarkan Keputusan Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia Bil : 3/40/96 yang bermesyuarat pada 7-9 Ogos 1996

LATAR BELAKANG

Garis Panduan mengenai khurafat dan azimat ini disediakan ekoran daripada Keputusan Muzakarah Jawatankuasa Fatwa yang bersidang pada 6 Oktober 1987 supaya diperincikan penjelasan mengenai khurafat dan azimat.

Ia bertujuan untuk memberi kefahaman dan penjelasan kepada umat Islam mengenai aspek-aspek khurafat dan azimat serta pandangan Islam mengenainya.

TAKRIF KHURAFAT

Menurut المعجم الواسيط Juzu' 1 (hal. 237) Khurafat ditakrifkan sebagai :

"الخرافة : الحديث المستملح المكذوب"

Bermaksud :

"Cerita-cerita yang mempersonakan yang dicampuradukkan dengan perkara dusta"

Menurut kamus المنجد في اللغة والاعلام (hal. 175) :

-الخرافة ج خرافات : الحديث الباطل مطلقا-

Maksudnya:

"Khurafat, jama'nya khurafat ialah sebarang cerita yang sebenar-benar dusta"

Menurut Kamus Idris al-Marbawi (hal. 169) pula khurafat ialah : cerita karut (karut-marut)

Dari beberapa definisi yang diutarakan, dapatlah dibuat kesimpulan seperti berikut :

"Khurafat ialah semua cerita sama ada rekaan atau khayalan, ajaran-ajaran, pantang-larang, adat istiadat, ramalan-ramalan, pemujaan atau kepercayaan yang menyimpang dari ajaran Islam"

Berdasarkan takrif di atas, khurafat merangkumi cerita dan perbuatan yang direka dan bersifat karut dan dusta.

TAKRIF AZIMAT

Takrif Azimat pula menurut المعجم الواسيط (hal. 621) ialah

Maksudnya: "Azimat : Jampi العزيمة : الرقية"

Menurut Dr. Yusuf al Qaradhawi di dalam bukunya Fatwa Mu'asirah (hal. 189) ialah : الرقية

"أن يرقى الشخص ويعزم عليه بكلام لا يفهم"

Maksudnya:

"Bahawa seseorang itu berjampi dan berazimat dengannya dengan kata-kata yang tidak dapat difahami."

Di dalam kamus *المعجم في اللغة والاعلام* (hal. 276) juga disebut bahawa azimat ialah *الرقية* iaitu memohon pertolongan/bantuan untuk memperolehi sesuatu perkara dengan menggunakan kekuatan yang melampaui kekuatan tabi'in.

Menurut Kamus Dewan, (hal. 70) Azimat ialah:

"Barang (tulisan) yang dianggap mempunyai sakti dan dapat melindungi pemakainya"

Berdasarkan takrif-takrif yang diberikan di atas, kesimpulannya azimat ialah suatu bentuk permohonan untuk mendapatkan pertolongan atau bantuan bagi manfaat diri sendiri atau untuk memudharatkan orang lain dengan menggunakan objek-objek dan ayat tertentu yang dianggap mempunyai kesaktian dan kuasa-kuasa ghaib yang melampaui kekuatan semulajadi apabila dijampi atau dipuja.

CIRI-CIRI KHURAFAT DAN AZIMAT

Di antara ciri-ciri khurafat ialah:

- a) Ianya tidak didasarkan pada nas-nas, syarak sama ada al-Quran atau al-Hadis.
- b) Ia merupakan cerita-cerita rekaan, dongeng, khayalan atau kepercayaan karut.
- c) Ia bersumberkan kepada kepercayaan-kepercayaan lama dan adat yang bercanggah dengan Islam.
- d) Ia berbentuk pemujaan dan permohonan kepada makhluk halus untuk tujuan yang memudharatkan dan menyeleweng daripada akidah Islam.
- e) Ia menggunakan objek-objek tertentu seperti kubur, pokok dan sebagainya untuk tujuan yang tertentu.
- f) Ia ada mempunyai unsur-unsur negatif pada akidah dan syariah Islam.

Sementara ciri-ciri azimat pula ialah:

- a) Kepercayaan kepada kekuatan sesuatu benda bukan berdasarkan kepada nas-nas syarak sama ada al-Quran atau al-Hadis.
- b) Menjadikan tulisan, tulisan, rajah-rajah dan objek-objek tertentu sebagai tangkal

- c) Menggunakan jampi serapah yang dicampuraduk dengan perkara-perkara kufur yang boleh membawa kepada syirik.
- d) Berjampi kepada objek-objek atau rajah-rajah yang dicampuraduk dengan ayat-ayat al-Quran untuk tujuan tertentu.

BENTUK-BENTUK KHURAFAT DAN AZIMAT


Di antara bentuk-bentuk khurafat ialah:

- a) Kepercayaan kepada keramat seperti kubur, pokok kayu, telaga keramat, batu, bukit, tongkat dan sebagainya
- b) Kepercayaan kepada sial majal seperti adat mandi Safar, adat mandi membuang sial dan sebagainya
- c) Kepercayaan kepada jin dan memohon pertolongan darinya seperti adat memuja kampung, adat merenjis tepong tawar, adat pantai dan sebagainya
- d) Kepercayaan kepada bertambah dan berkurangnya rezeki seperti adat memuja semangat padi yang dilakukan oleh petani-petani seperti bersemah (memuja semangat padi) dan membuang ancak di sungai dan laut dan bermain pantai
- e) Kepercayaan kepada petanda-petanda dan pantang larang, contohnya seperti tidak boleh melihatkan bayi di muka cermin kerana kelak ia akan mati di dalam air. Tidak boleh keluar ketika gagak berbunyi, takut mendapat sial atau bala dan sebagainya
- f) Percaya kepada amalan-amalan bintang, angka-angka atau rajah-rajah tertentu
- g) Memuja objek-objek tertentu, roh nenek moyang, kubur-kubur yang dianggap wali dan sebagainya

Sementara bentuk-bentuk azimat ialah:

- a) Menjampi batu, cincin, rantai, baju, keris dan sebagainya untuk dijadikan pelindung diri seperti ilmu kebal, ilmu pengasih dan sebagainya
- b) Membungkus tulisan-tulisan, rajah-rajah atau objek-objek tertentu dengan kain kuning untuk dijadikan tangkal

- c) Menjampi tulisan-tulisan yang tidak diketahui maknanya seperti dan dicampuradukkan dengan ayat-ayat al-Quran contohnya: **الصلاة**



- d) Berjampi atau berazimat menggunakan kata-kata dicampuradukkan dengan kata-kata sihir dan kufur yang tidak diketahui maknanya, contohnya:
"Bikana, makna, Nabi Yakun, Numa Yakun Akulah sebenar-benar Zat Allah"

HUKUM BERAMAL DENGAN KHURAFAT DAN AZIMAT

Islam sangat menitikberatkan soal-soal akidah dan syariah. Segala amalan dan kepercayaan yang tidak berdasarkan kepada sumber-sumber yang asal seperti al-Quran, al-Hadis, Ijma' dan Qias adalah ditolak oleh Islam.

Sabda Rasulullah S.A.W :

عن عائشة رضى الله عنها قالت : قال رسول الله ﷺ : من أحدث في
 أمرنا هذا ما ليس منه فهو رد
 (متفق عليه)

Maksudnya:

"Barangsiapa mengada-adakan di dalam agama kami sesuatu yang tidak ada didalamnya, maka yang dikerjakannya itu adalah tertolak."

(Riwayat Bukhari dan Muslim)

Dan sabdanya lagi :

عن عائشة رضى الله عنها قالت : قال رسول الله ﷺ : من عمل عملاً
 ليس عليه أمرنا فهو رد

Maksudnya: (رواه أحمد ومسلم)

"Barangsiapa mengerjakan sesuatu pekerjaan yang tiada di dalam agama kami, maka yang dikerjakannya itu tertolak"

(Hadis Riwayat Ahmad dan Muslim)

Di dalam Islam, percaya kepada benda-benda yang dijadikan sebagai benda keramat seperti pokok, kubur, telaga dan sebagainya, serta memuja, memohon pertolongan dan melepaskan nazar pada benda-benda berkenaan dan percaya ianya mempunyai kuasa selain dari Allah S.W.T, adalah membawa kepada syirik dan bertentangan dengan kepercayaan tauhid kepada Allah S.W.T.

Kepercayaan kepada sial, majal dan beramal dengan mandi, seperti mandi Safar, jampi dan sebagainya untuk menolaknya adalah syirik dan merosakkan akidah. Rasulullah melarang keras orang yang mempercayai sial.

Sabdanya :

عن ابن مسعود مرفوعا قال رسول الله ﷺ : الطيرة شرك الطيرة وما منا
الا ولكن الله يذهب بالتوكل.

(رواه أبو داود والترمذي)

Maksudnya:

"Percaya kepada burung itu syirik, percaya kepada buruk itu syirik, dan tiada seorang pun dari kita melainkan dilanda oleh perasaan itu, tetapi Allah akan menghilangkannya dengan tawakkal." (Burung yang disebutkan sebagai contoh termasuk seperti biawak, gagak, kelicap).

(Hadis Riwayat Abu Daud dan Tarmidzi)

Amalan memuja jin dan memohon pertolongan darinya seperti yang selalu dilakukan oleh seseorang bomoh dan dukun adalah syirik dan menyesatkan. Orang-orang yang bersahabat dan menggunakan jin seperti tukang sihir dan tukang tenung adalah tergolong di dalam golongan orang-orang yang bodoh dan menzalimi diri sendiri. Ini dijelaskan oleh firman Allah S.W.T. :

ولا تدع من دون الله ما لا ينفعك ولا يضرك فإن فعلت فإنك إذا من
الظالمين

Maksudnya: (سورة يونس 106)

"Dan janganlah engkau menyembah atau memuja yang lain dari Allah, yang tidak dapat mendatangkan manfaat kepadamu dan juga tidak dapat mendatangkan mudharat kepadamu. Sekiranya engkau mengerjakan yang demikian maka jadilah engkau orang-orang yang berlaku zalim (terhadap diri sendiri dengan perbuatan syirik itu)"

(Surah Yunus : 106)

Sabda Rasulullah S.A.W

عن أبي هريرة رضي الله عنه قال : قال رسول الله ﷺ : من أتى عرافا
أو ساحرا أو كاهنا فصدقه بما يقول فقد كفر بما أنزل على محمد ﷺ

Maksudnya: (رواه أحمد والحاكم)

"Barangsiapa yang menemui tukang tilik atau tukang sihir dan menanyakan sesuatu kepadanya lalu terus mempercayai apa yang dikatakannya, maka sesungguhnya ia telah mengkufurkan apa yang telah diturunkan kepada Nabi Muhammad S.A.W"

(Riwayat Ahmad dan Hakim)

Sabdanya lagi:

عن عمران بن حصين قال : قال رسول الله ﷺ : ليس منا من تطير ولا
من تطير له أو تكهن أو سحر أو سحر له

(رواه الطبراني)

Maksudnya:

"Bukan dari golongan kami sesiapa yang merasa sial atau meminta diramalkan kesialannya atau merenung nasib atau meminta ditenungkan atau mensihirkan atau meminta disihirkan"

(Riwayat al-Tabrani)

Amalan penggunaan azimat atau tangkal sebagai pelindung seperti ilmu kebal, ilmu pengasih, ilmu pelemah hati, ilmu penjauh jin dan sebagainya yang dicampuradukkan dengan sihir adalah syirik dan menyeleweng dari ajaran Islam. Di dalam hadis riwayat Abu Daud dan Imam Ahmad, Rasulullah pernah bersabda:

عن ابن مسعود رضى الله عنه قال قال رسول الله ﷺ : ان الرقى والتمايم
والتولة شرك

Maksudnya: (رواه أبو داود وأحمد)

"Dari Ibn Mas'ud, katanya: Rasulullah S.A.W telah bersabda: Sesungguhnya jampi mantera, tangkal dan ilmu pengasih adalah syirik"

(Riwayat Abu Daud dan Ahmad)

Jampi mantera juga merupakan bentuk azimat yang seringkali dilakukan sabda Rasulullah S.A.W.

عن عوف بن مالك قال : كنا ترقى في الجاهلية، فقلنا يا رسول الله :
كيف ترقى في ذلك؟ فقال : اعرضوا على رفاقكم لا بأس بالرقى ما لم
يكن فيه شرك

Maksudnya: (رواه مسلم)

"Dari Auf Ibn Malik, katanya: Dahulu kami melakukan jampi di zaman jahiliyah, lalu kami bertanya: Wahai Rasulullah! Bagaimana pendapat tuan dalam hal ini? Beliau bersabda: Perlihatkanlah kepadaku jampi-jampimu itu. Tidak mengapa melakukan jampi-jampi itu selama tidak mengandungi hal-hal syirik."

(Hadis Riwayat Muslim)

Menurut Dr. Yusuf al-Qaradhawi di dalam kitab Fatwa al-Mu'asirah sesuatu jampi itu harus dilakukan berdasarkan kepada 3 syarat:

- i. Ia mesti didasarkan kepda Allah S.W.T dan nama-nama-Nya.
- ii. Ia mestilah dituturkan dengan bahasa Arab dan kata-kata yang boleh difahami maknanya.
- iii. Beriktikad bahawa ianya tidak memberi kesan dengan sendirinya, tetapi dengan takdir Allah S.W.T.

Di dalam amalan perubatan tradisional, terdapat jenis-jenis jampi yang dibolehkan (diharuskan) dan ada yang diharamkan. Jampi-jampi tersebut ialah:

I. Jampi yang diharuskan

Jampi jenis ini ialah jampi yang menetapi 3 syarat seperti yang dinyatakan di atas.

II. Jampi yang diharamkan

Jampi yang ditegah dan diharamkan ialah jampi yang mengandungi unsur-unsur syirik, pemujaan jin, syaitan, menggunakan ilmu hitam atau sihir, menggunakan bahasa-bahasa yang tidak difahami atau bercampuraduk, seperti jampi yang dimulakan dengan Bismillah atau Alhamdulillah dan diseru nama-nama hantu dan jin, kemudian disudahi dengan ucapan "Berkat kata Lailahaillallah Muhammadar Rasululllah" atau seumpamanya.

PENUTUP

Kesimpulannya, segala bentuk khurafat dan azimat sama ada yang berbentuk amalan atau kepercayaan boleh membawa kepada syirik dan kepada bertentangan dengan akidah dan syariah Islam.

Garis Panduan

SIRI 2



**GARIS
PANDUAN**

**PERBOMOCHAN
MENURUT
ISLAM**

1. TUJUAN

- 1.1 Garis panduan ini disediakan untuk dijadikan panduan kepada umat Islam khususnya mereka yang terlibat dengan amalan perbomohan tradisional supaya terhindar dari amalan yang bertentangan dengan aqidah, syariat dan akhlak Islam yang sebenar.

2. PENDAHULUAN

- 2.1 Islam amat menitikberatkan soal-soal aqidah, syariah dan akhlak. Segala amalan dan kepercayaan yang tidak berdasarkan kepada sumber-sumber asal al-Quran, Hadis, Ijmak dan Qias adalah ditolak. Dalam urusan perubatan kepada pesakit, satu perkara harus diingat oleh semua pihak, bahawa hanya Allah sahaja berkuasa mutlak menentukan sesuatu dan menjadikannya, lebih-lebih lagi sakit dan sembuh adalah hak-Nya, manusia hanyalah disuruh berusaha dan berikhtiar. Dalam hubungan ini, umat Islam di negara ini ada kepercayaan-kepercayaan dan amalan-amalan tradisi tertentu dan sedikit sebanyak ada hubungannya dengan pengaruh dari fahaman Anamisme, Dinamisme, Hindu dan lain-lain.
- 2.2 Garis panduan ini perlu dijadikan asas dan panduan supaya dapat mengelakkan diri dari penyelewengan dalam aqidah dan syariat Islam. Allah S.W.T berfirman:

وَلَا تَدْعُ مِنْ دُونِ اللَّهِ مَا لَا يَنْفَعُكَ وَلَا يَضُرُّكَ فَإِنْ فَعَلْتَ فَإِنَّكَ إِذَا مِنْ الظَّالِمِينَ (١٠٦)

Maksudnya:

"Dan janganlah engkau (wahai Muhammad) menyembah atau memuja yang lain dari Allah, yang tidak dapat mendatangkan manfaat kepadamu dan juga tidak dapat mendatangkan mudarat kepadamu. Oleh itu, sekiranya engkau mengerjakan yang demikian, maka pada saat itu menjadilah engkau dari orang-orang yang berlaku zalim (terhadap diri sendiri dengan perbuatan syirik itu)"

(Surah Yunus: 106)

Di samping itu Islam tidak membenarkan umatnya menggunakan sihir, kerana Rasulullah S.A.W bersabda:

عَنْ أَبِي هُرَيْرَةَ عَنِ النَّبِيِّ ﷺ قَالَ : اجْتَنِبُوا السَّبْعَ الْمُزَيَّاتِ قَالُوا يَا رَسُولَ اللَّهِ وَمَا هُنَّ قَالَ الشُّرْكُ بِاللَّهِ وَالسَّحَرُ وَقَتْلُ النَّفْسِ الَّتِي حَرَّمَ اللَّهُ إِلَّا بِالْحَقِّ وَأَكْلُ الرِّبَا وَأَكْلُ مَالِ الْيَتِيمِ وَالتَّوَلَّى يَوْمَ الرَّحْفِ وَقَذْفُ الْمُحْصَنَاتِ الْمُؤْمِنَاتِ الْغَافِلَاتِ .

(رواه البخارى)

Maksudnya :

"Jauhilah tujuh perkara merosakkan." Para sahabat bertanya, "apakah tujuh perkara itu?" Baginda menjawab: "menyekutukan Allah, sihir, membunuh orang tanpa hak, makan riba, makan harta anak yatim, lari dari medan perang dan menuduh perempuan baik melakukan maksiat terkutuk."

(Hadis riwayat al-Bukhari, Kitab Sahih al-Bukhari, Kitabul Hudud, Bab 44, m.s 33).

Selain itu Rasulullah S.A.W. bersabda:

قَالَ أَبُو الزُّبَيْرِ: وَسَمِعْتُ جَابِرَ بْنَ عَبْدِ اللَّهِ يَقُولُ : لَدَعْتُ رَجُلًا مِنَّا عَقْرَابًا.
وَنَحْنُ جُلُوسٌ مَعَ رَسُولِ اللَّهِ ﷺ، فَقَالَ رَجُلٌ: يَا رَسُولَ اللَّهِ أَزُقِي؟ قَالَ: «مَنْ
اسْتَطَاعَ مِنْكُمْ أَنْ يَنْفَعَ أَخَاهُ فَلْيَفْعَلْ».

Maksudnya : (رواه مسلم)

Berkata Abu Zubair, aku dengan Jabir bin Abdullah berkata, seorang lelaki daripada kami telah disengat kala jengking. Ketika itu kami duduk bersama Rasulullah S.A.W. Maka berkata seorang lelaki wahai Rasulullah! Bolehkah aku jampi? Baginda bersabda "Barangsiapa yang mampu di antara kamu untuk memberi manfaat kepada saudaranya maka hendaklah dilakukan".

(Hadis riwayat Imam muslim – Bab Istihrab al-Ruqyah min Al-Ain wa An Namlah wal Hummah wal An Naqrah, Jld. 9, m.s 5905)

2.3 Dalam sejarah Islam memang wujud cara perubatan tertentu sepertimana yang dilaksanakan oleh Rasulullah S.A.W dan para sahabat. Selain dari cara pengubatan biasa, mereka juga telah menggunakan doa-doa, khusus bagi mengubati penyakit-penyakit sepertimana yang terdapat di dalam buku-buku perubatan ni. Walau bagaimanapun, mereka tidak menggunakan kaedah atau kepercayaan seperti yang difahami oleh sesetengah pihak yang tidak dikehendaki syarak seperti dengan memanggil roh datuk nenek, roh wali-wali, syeikh-syeikh dan khadam-khadam tertentu. Oleh itu, kita dibolehkan untuk melakukan jampi kepada diri, kaum keluarga atau orang lain yang ditimpa kesusahan, kerana jampi merupakan doa perlindungan berdasarkan syarak. Jika lain daripada itu, perlu dilihat adakah ia berlawanan dengan syarak atau tidak.

2.4 Takrif

- 2.4.1 Bomoh, menurut Kamus Dewan ialah tabib kampung (yang mengubati orang sakit dengan menggunakan tradisional atau cara kampung dan jampi-jampi)
- 2.4.2 Dukun ialah orang yang mengubat orang sakit atau memberi ubat cara kampung atau tradisional (dengan membaca jampi serapah dan sebagainya) (Kamus Dewan, Dewan Bahasa dan Pustaka, KL. 1989, ms 297)

2.4.3 Pawang ialah:

- i. Orang yang mempunyai kebolehan yang istimewa untuk melakukan sesuatu (biasanya dengan menggunakan kuasa ghaib)
- ii. Orang yang pandai mengubati orang sakit dan lain-lain (dengan menggunakan jampi mantera dan lain-lain)
(Kamus Dewan, Dewan Bahasa dan Pustaka, KL, 1989, ms 920)

2.4.4 Jampi:

Jampi ialah perlindungan yang dijampi kepada seseorang yang menghadapi sakit seperti demam, pening dan lain-lain penyakit. Dalam bahasa Arab, jampi dikenali dengan *al-Ruqa* atau *al-Ruqyah*.

2.5 Garis panduan bomoh ini mengandungi perkara-perkara berikut:

2.5.1 Asal Usul Perbomohan

2.5.2 Matlamat Perbomohan

2.5.3 Syarat-syarat Perbomohan

2.5.4 Mengenai Bomoh

2.5.5 Ikrar dan Sumpah

2.5.6 Pantang larang

2.5.7 Adab Semasa Perbomohan

2.5.8 Pengalaman Perbomohan

2.5.9 Bayaran Perkhidmatan/Pengeras

2.5.10 Pengijazahan

2.5.11 Tertakluk kepada Undang-Undang Negara

3. GARIS PANDUAN PERBOMOCHAN

3.1 Asal-Usul Perbomohan

Setiap individu atau kumpulan tidak boleh mendakwa bahawa perbomohannya bersumber dari Nabi Muhammad S.A.W, para anbia atau diambil daripada al-Quran dan Hadis atau berasal daripada amalan para sahabat Nabi S.A.W atau lain-lain jika tidak ada alasan yang kukuh berdasarkan nas al-Quran dan al-Hadis.

3.2 Matlamat Perbomohan

- 3.2.1 Matlamat perbomohan hendaklah matlamat yang baik seperti untuk kesihatan tubuh badan, kerukunan hidup bermasyarakat dan berumah tangga
- 3.2.2 Dilarang sama sekali untuk membalas dendam, membuat aniaya, menakutkan, mengugut orang lain dan lain-lain.

3.3 Syarat-Syarat Perbomohan

- 3.3.1 Bagi memastikan perbomohan tidak bercanggah dengan ajaran Islam perkara berikut hendaklah dikenalpasti:
 - i Tidak menggunakan bentuk amalan sihir, ilmu hitam, tilik tenung, tukang nujum, ramalan tapak tangan dan silap mata.
 - ii Tidak boleh mengaitkan sesuatu pengeras dengan suatu akibat
 - iii Tidak boleh melakukan perkara-perkara yang berunsur syirik seperti semah pantai, sembelihan binatang, buang ancak dan lain-lain
 - iv Tidak boleh percaya kepada sial dan mudarat yang menimpa seseorang atau diri
 - v Tidak boleh menyembelih binatang untuk sesuatu tujuan bukan syar'i
 - vi Tidak boleh melakukan perbomohan atau bacaan tertentu yang menggunakan unsur-unsur meminta izin atau bantuan dari kuasa-kuasa makhluk "ghaib" dalam acara perbomohan
 - vii Tidak boleh menyajikan makanan untuk menjamu penunggu
 - viii Tidak boleh mentaati bomoh atau seseorang pada perkara-perkara yang jelas bercanggah dengan aqidah dan syariat Islam

- ix Menolak sebarang syarat yang diberikan bertentangan dengan aqidah, syariah dan akhlak Islam

3.4 Mengenai Bomoh

- 3.4.1 Bomoh hendaklah beragama Islam, aqil dan baligh serta mengetahui apa yang diucapkannya
- 3.4.2 Tidak melakukan perkara-perkara yang boleh membawa syirik, sama ada melalui iktikad, perkataan atau perbuatan
- 3.4.3 Tidak menigggalakan ibadat-ibadat wajib dalam Islam seperti sembahyang fardhu, puasa dan zakat
- 3.4.4 Tidak melakukan maksiat, jenayah dan yang bertentangan dengan undang-undang Negara
- 3.4.5 Tidak memecahbelahkan masyarakat dan keluarga
- 3.4.6 Tidak mentafsir ajaran agama Islam mengikut hawa nafsu
- 3.4.7 Tidak memasukkan atau menggunakan unsur-unsur yang bercanggah dengan Islam seperti sihir, ilmu hitam dan menurun kerana pengamalannya termasuk dalam kategori penyeru iblis dan syaitan dengan ucapan-ucapan yang tidak wajar atau boleh membawa kepada kufur dan syirik
- 3.4.8 Tidak boleh bersahabat dengan makhluk ghaib seperti jin dengan tujuan mendapat pertolongan dalam perkara yang ditegah oleh syarak walaupun dikatakan dengan jin Islam kerana kita tidak tahu sama ada betul Islam atau tidak
- 3.4.9 Tidak boleh meminta pertolongan jin dalam rawatan perubatan sehingga membawa kepada syirik kerana dibimbangi wujud unsur menafikan kudrat Allah
- 3.4.10 Tidak harus meminta pertolongan jin untuk mencari kekuatan dan kehebatan kerana dibimbangi wujud keyakinan bahawa makhluk-makhluk ini mempunyai kuasa yang sama dengan Allah atau mengurangkan keyakinan kepada kuasa Allah semata-mata
- 3.4.11 Tidak harus meminta dan menggunakan khidmat jin untuk ilmu sihir atau nujum atau 'menurun' kerana ia termasuk dalam amalan syirik atau dilarang oleh Allah dan boleh merosakkan aqidah orang yang terlibat dengannya

- 3.4.12 Tidak boleh melakukan ramalan tentang buruk atau baik pada masa akan datang dan tidak harus menyatakan pada ramalan yang telah lalu dengan cara tebakan, tenung dan lain-lain
- 3.4.13 Hendaklah mengikhlaskan hati dengan amalan, semata-mata mencari keredhaan Allah S.W.T
- 3.4.14 Hendaklah sentiasa bertaqwa kepada Allah. Kerana Allah sahaja yang memberi kebaikan dan pertolongan

3.5 Ikrar Sumpah Dan Taat Setia

- 3.5.1 Sumpah tidak dibolehkan semasa perbomohan, hanya ikrar saja boleh digunakan mengikut kesesuaian
- 3.5.2 Pengamal perbomohan tidak boleh taat secara membuta tuli kepada bomoh. Mereka boleh mengikut suruhan bomoh tertentu selama tidak bercanggah dengan hukum syarak
- 3.5.3 Bacaan-bacaan, amalan dan ikrar yang terdapat di dalam pengakuan ikrar hendaklah tidak mengandungi perkara-perkara yang bercanggah dengan aqidah dan syariat Islam seperti memuja dewa, atau nama berhala
- 3.5.4 Di dalam upacara ikrar sama ada dari segi fizikal atau mental hendaklah tidak mempunyai unsur-unsur yang mensyirikkan Allah dan menjatuhkan maruah seseorang sebagai orang Islam

3.6 Pantang Larang

- 3.6.1 Tidak boleh dikaitkan dengan pantang larang sesuatu unsur pemujaan, meminta izin, perlindungan atau bantuan daripada makhluk-makhluk ghaib seperti hantu, jin, penunggu atau orang halus dan sebagainya
- 3.6.2 Tidak boleh memenuhi kehendak pantang larang bomoh sehingga melakukan perkara-perkara yang ditegah di dalam Islam seperti meninggalkan tanggungjawab sebagai suami isteri, membuka aurat, bersunyian antara pesakit yang lain jantina dengan bomoh sahaja dan sebagainya
- 3.6.3 Perkara-perkara yang harus dan halal dalam syariat Islam tidak boleh dihukumkan haram atau sebaliknya
- 3.6.4 Tidak menurut apa-apa pendapat bomoh yang bertentangan dengan apa juga perkara yang berhubung dengan aqidah, syariah dan akhlak Islam

3.7 Adab Semasa Perbomohan

- 3.7.1 Tidak mendakwa perkara-perkara yang ghaib
- 3.7.2 Bomoh tidak boleh takbur dan tidak boleh menganggap orang lain lemah dan lekeh
- 3.7.3 Bomoh hendaklah melarang pesakitnya memuja, mengagung dan taksub kepadanya
- 3.7.4 Bomoh hendaklah mengikut adab sopan dan tatatertib Islam ketika menolong seseorang sama ada bersendirian atau bersama pesakit
- 3.7.5 Hendaklah menjaga kesopanan susila adab sebagai orang Islam

3.8 Pengamalan Bomoh

- 3.8.1 Perbomohan tidak boleh dikaitkan dengan zat Allah dan sifat-sifat-Nya atau merupakan maksud di sebalik kalimah atau nama-nama Allah atau sifat-sifat-Nya seperti mengatakan ilmu bomoh itu diterima terus dari Allah atau kudratnya adalah kudrat Allah, atau melalui mimpi berjumpa wali, malaikat atau lainnya
- 3.8.2 Pengamalan bomoh tidak boleh diertikan sebagai maksud yang tersirat daripada diri atau jasad dan roh Rasulullah S.A.W, para malaikat, nabi-nabi dan orang soleh seperti Nur Muhammad menjelma ke dalam diri dan sebagainya
- 3.8.3 Tidak boleh memuja dan memperhambakan diri kepada sesuatu kuasa atau peribadi yang dipercayai boleh mendatangkan nasib baik atau buruk kepada seseorang seperti wali syeikh, rijalul ghaib, roh datuk nenek, sahabat, hantu, dewa, keramat, kubur, keris, busur, batu, kayu, cincin, kain kuning atau putih dan lain-lain
- 3.8.4 Tidak boleh menggunakan tangkal dan azimat yang mengandungi rajah-rajah atau tulisan-tulisan yang tidak difahami seperti objek-objek tertentu dan bercampuraduk dengan ayat al-Quran dan jangan menganggapkan tangkal mempunyai kuasa
- 3.8.5 Penggunaan jampi dibolehkan dan digunakan dengan syarat:
 - i. Menggunakan ayat al-Quran

ii. Menggunakan bahasa yang difahami

iii. Jangan mengiktikadkan bahawa jampi itu yang memberi kesan sehingga si pesakit menjadi sembuh, sebaliknya Allah yang berkuasa

3.8.6 Tidak boleh mengamalkan bacaan–bacaan tertentu yang tidak difahami maknanya dikhuatiri mengandungi kata–kata pemujaan kepada berhala, iblis, syaitan atau nama berhala orang kafir serta bercampur aduk dengan ayat al–Quran

3.8.7 Tidak boleh membaca mana–mana ayat al–Quran secara songsang, seperti *Qui Huwallab* dan lain–lain

3.8.8 Tidak boleh menggunakan Kitab al–Quran secara tidak wajar menurut syarat seperti menggantung al–Quran dan tunggu berpusing atau tidak untuk dijadikan alasan tertentu jika berpusing begini dan jika tidak, begini pula maksudnya. Semuanya ini termasuk menghina al–Quran (*Istihza*)

3.8.9 Tidak boleh meninggalkan ibadat–ibadat wajib yang dituntut di dalam Islam seperti sembahyang lima waktu dan puasa di bulan Ramadan ketika melakukan amalan perbomohan

3.8.10 Tidak boleh mengguna perkataan ‘menurun’, memanggil roh orang mati atau sebagainya dalam kaedah perbomohan

3.9 Bayaran Perkhidmatan / Pengeras

3.9.1 Sebarang pengeras tidak boleh digunakan dalam perbomohan jika ia dikaitkan dengan untung nasib, buruk atau baik

3.9.2 Bayaran perkhidmatan hanya dibolehkan mengikut kesesuaian perubatan dengan tidak terlampau tinggi hingga boleh memberatkan atau menindas dan tidak membawa maksud tolong–menolong

3.10 Pengijazahan

3.10.1 Tidak boleh melakukan upacara–upacara yang mengandungi unsur–unsur penyembahan, pemujaan, memohon bantuan atau memperhambakan diri kepada kuasa–kuasa atau tenaga–tenaga ghaib seperti mempersembah sedulang makanan, menyembelih ayam dan sebagainya

3.11 Tertakluk kepada undang-undang negara

Semua pengamal ilmu perbomohan perlu patuh kepada undang-undang negara

4 PENUTUP

Dengan mengikut garis panduan ini diharapkan para pengamal ilmu perbomohan dapat menghindarkan diri daripada ajaran sesat dan aqidah yang karut agar hidup sentiasa dirahmati Allah S.W.T

Garis Panduan

SIRI 2



**GARIS
PANDUAN**

**SILAT
MENURUT
ISLAM**

1. TUJUAN

- 1.1 Garis panduan ini disediakan untuk dijadikan panduan kepada umat Islam khususnya mereka yang terlibat dengan amalan seni mempertahankan diri tradisional (silat) supaya terhindar dari amalan yang bertentangan dengan akidah dan syariat Islam yang sebenar

2. PENDAHULUAN

- 2.1 Islam amat menitikberatkan soal-soal akidah dan syariah. Segala amalan dan kepercayaan yang tidak berasaskan kepada sumber-sumber asal al-Quran, Hadis, Ijmak dan Qias adalah ditolak. Kepercayaan-kepercayaan dan amalan-amalan tertentu dalam masyarakat Islam di Malaysia sedikit sebanyak ada hubungkaitnya dengan pengaruh fahaman Anamisme, Dinamisme, Hindu, Buddha dan Syariah (Ghulul) yang sebahagiannya telah menjadi darah daging kepada pengamal suci mempertahankan diri tradisional (silat). Oleh itu garis panduan ini perlu dijadikan asas dan panduan supaya dapat mengelakkan diri daripada terjerus ke dalam penyelewengan akidah dan syariat Islam

Allah berfirman dalam Surah Yunus, ayat 106:

وَلَا تَدْعُ مِنْ دُونِ اللَّهِ مَا لَا يَنْفَعُكَ وَلَا يَضُرُّكَ فَإِنْ فَعَلْتَ فَإِنَّكَ إِذَا مِنَ الظَّالِمِينَ ﴿١٠٦﴾

Bermaksud :

"Dan janganlah kamu menyembah apa-apa yang tidak memberi manfaat dan tidak (pula) memberi mudharat kepadamu selain Allah sebab jika kamu berbuat (yang demikian) itu, sesungguhnya kamu termasuk orang-orang yang zalim"

- 2.2 Dalam sejarah Islam memang wujud pahlawan-pahlawan yang terkemuka di kalangan para sahabat Rasulullah S.A.W. Mereka telah berjuang menentang Musyrikin Quraisy dan penentang-penentang ajaran Islam dari kalangan Munafikin. Antara sahabat berkenaan ialah Saidina Ali, Khalid Ibnu Walid, Amru b. As-As, Abu Ubaidah b. Al-Jarrah, Saad b. Abi Waqas dan lain-lain lagi. Di dalam al-Quran didapati banyak ayat-ayat yang menunjukkan bahawa perlunya umat Islam mempersiapkan diri dan kelengkapan senjata serta kemudahan-kemudahan yang perlu untuk mempertahankan agama, diri dan engara. Antaranya ayat 61 surah Al-Anfaal:

وَإِنْ جَنَحُوا لِلسَّلَامِ فَاجْنَحْ لَهَا وَتَوَكَّلْ عَلَى اللَّهِ إِنَّهُ هُوَ السَّمِيعُ الْعَلِيمُ ﴿٦١﴾

"Dan jika mereka (pihak musuh) cenderung kepada perdamaian, maka engkau juga hendaklah cenderung kepadanya serta bertawakallah kepada Allah. Sesungguhnya Ia Maha Mendengar, Lagi Maha Mengetahui

2.3 Di dalam ilmu persilatan terdapat beberapa syarat yang perlu dipatuhi sama ada ketika hendak masuk silat, setelah masuk atau selepas tamat dan diijazahkan. Di antara syarat-syarat tersebut:

- a. Menyediakan pengeras seperti pulut kuning, limau purut, kain putih, bayaran pengeras dan sebagainya
- b. Mandi dengan air mandian tertentu sebagai lambang membersihkan segala kekotoran zahir dan batin
- c. Tidak boleh meninggalkan sembahyang
- d. Tidak boleh banyak bertanya ketika guru sedang mengajar atau mempersoalkan sebarang tindakan guru
- e. Melakukan gerak silat membuka atau menutup gelanggang setiap kali memula atau menamatkan latihan silat

2.4 Guru memainkan peranan penting di dalam menyampaikan sesuatu ilmu bagi menjamin kesahihan dan kesempurnaan ilmu tersebut. Di dalam ilmu persilatan, guru adalah lambang kesempurnaan

2.5 Sesuatu seni mempertahankan diri tradisional (silat) itu perlulah didasarkan kepada garis panduan berikut bagi mengenalpasti ianya terhindar daripada perkara-perkara yang bercanggah dengan syariat Islam:

- (a) Asal usul silat
- (b) Syarat-syarat silat
- (c) Guru silat
- (d) Ikrar sumpah dan taat setia
- (e) Pantang larang
- (f) Adab

- (g) Gerak langkah
- (h) Amalan dalam silat
- (i) Pengijazahan
- (j) Matlamat silat

3. GARIS PANDUAN SILAT DAN SENI MEMPERTAHANKAN DIRI

3.1 Asal Usul Silat

3.1.1 Demi menjaga kesucian akidah Islam, beberapa perkara perlu diambil perhatian iaitu setiap individu atau kumpulan tidak boleh mendakwa bahawa:

- (a) Silat mereka bersumberkan dari Nabi Muhammad S.A.W, para anbia atau diambil dari al-Quran dan Hadis atau berasal dari amalan sahabat Nabi S.A.W
- (b) Teknik atau pergerakan persilatannya berasal daripada ibadat-ibadat tertentu seperti rukun-rukun solat
- (c) Seni silat mereka bersumberkan mimpi bertemu Rasulullah S.A.W atau para anbia yang lain atau para sahabat serta ulama

3.2 Syarat-Syarat Silat

3.2.1 Bagi memastikan syarat-syarat di dalam ilmu persilatan tidak bercanggah dengan ajaran Islam maka:

- (a) Semua perkara yang wajib dilakukan atau ditinggalkan oleh seseorang Islam yang mukalaf tidak boleh dijadikan syarat di dalam silat seperti sembahyang, puasa, jangan durhaka kepada ibubapa, sehingga mendatangkan anggapan bahawa perkawa wajib tersebut menjadi wajib hanya apabila dijadikan syarat
- (b) Tidak boleh mengaitkan sesuatu pengeras dengan suatu akibat yang dipercayai boleh merosakkan pegangan akidah
- (c) Tidak boleh percaya kepada sial seperti mandi membuang sial atau mandi-mandi tertentu dikaitkan dengan persilatan

- (d) Tidak boleh melakukan gerak silat atau bacaan tertentu yang mengandung unsur-unsur meminta izin atau bantuan daripada kuasa-kuasa makhluk 'ghaib' dalam acara 'gerak membuka atau menutup gelanggang', 'ayat kebal' atau 'pukulan angin maut' atau sembelih ayam dalam gelanggang
- (e) Tidak boleh mentaati guru atau seseorang pada perkara-perkara yang jelas bercanggah dengan akidah dan syariat Islam
- (f) Sebarang syarat yang bertentangan dengan akidah, syariah dan akhlak Islam

3.3 Guru Silat

3.3.1 Guru silat yang beragama Islam hendaklah bukan terdiri daripada:

- (a) Mereka yang melakukan perkara-perkara syirik, sama ada melalui perkataan, perbuatan atau iktikad
- (b) Mereka yang melakukan maksiat/jenayah dan yang bertentangan dengan moral
- (c) Pemecah belah masyarakat
- (d) Mereka yang mentafsir ajaran agama Islam mengikut hawa nafsu

3.3.2 Jika seseorang guru silat hendak melibatkan diri dalam hal agama hendaklah mengetahui asas-asas agama Islam sama ada fardhu ain atau fardhu kifayah seperti rukun Islam, rukun Iman, cara mengerjakan sembahyang dan sebagainya

3.3.3 Guru silat dilarang memasukkan atau menggunakan unsur-unsur yang bercanggah dengan Islam seperti sihir dan ilmu kebal di dalam ilmu persilatan

3.4 Ikrar Sumpah Dan Taat Setia

3.4.1 Sumpah tidak dibolehkan sebaliknya hanya ikrar

3.4.2 Murid-murid tidak boleh taat secara membuta tuli kepada guru mereka hendaklah mengikut perintah guru selama tidak bercanggah dengan perintah Allah

3.4.3 Sumpah tidak boleh digunakan kepada perkara-perkara yang telahpun diwajibkan di dalam Islam seperti bersumpah akan taat kepada ibubapa, bersumpah taat kepada Allah dan Rasul dan sebagainya

- 3.4.4 Bacaan-bacaan, amalan dan ikrar yang terdapat di dalam sumpah hendaklah mengandungi perkara-perkara yang tidak bercanggah dengan akidah dan syariat Islam seperti memuja dewa, atau nama berhala
- 3.4.5 Di dalam upacara sumpah dan bai'ah sama ada daripada segi fizikal atau mental hendaklah tidak mempunyai unsur-unsur yang mensyirikkan Allah dan menjatuhkan maruah seseorang sebagai umat Islam

3.5 Pantang Larang

- 3.5.1 Suatu pantang larang hendaklah bukan daripada perkara yang jelas diwajibkan di dalam Islam seperti tidak meninggalkan sembahyang, jangan berkelahi sesama ahli dan sebagainya
- 3.5.2 Suatu pantang larang tidak boleh dikaitkan dengan unsur-unsur pemujaan, meminta izin, perlindungan atau bantuan daripada makhluk-makhluk ghaib seperti larangan berludah kerana ditakuti ilmu tidak menjadi
- 3.5.3 Tidak boleh mematuhi kehendak pantang larang sehingga melakukan perkara-perkara yang ditegah di dalam Islam seperti meninggalkan tanggungjawab sebagai suami atau isteri dan sebagainya
- 3.5.4 Perkara-perkara yang harus dan halal tidak boleh dihukumkan haram

3.6 Adab

3.6.1 Adab Murid dengan Guru

- (a) Guru tidak boleh menganggap dirinya yang paling mulia dan tidak pernah bersalah
- (b) Guru hendaklah mengelakkan diri daripada dianggap orang yang perlu ditaati secara mutlak
- (c) Guru tidak boleh menganggap orang lain lemah dan lekeh
- (d) Guru hendaklah melarang murid-muridnya memuja, mengagung dan taksub kepadanya

3.6.2 Adab Sesama Murid Seperguruan

- (a) Seseorang murid tidak boleh memberikan hak secara khusus kepada murid seperguruannya sahaja, seperti memberi ucapan salam, tidak boleh bergaduh sesama ahli dan sebagainya

- (b) Seseorang murid tidak boleh menanam atau mengapi-apikan perasaan bangga diri dan taksub kepada kumpulannya sehingga memandang hina dan negatif kepada orang lain

3.6.3 Adab Murid Dengan Orang Lain

- (a) Seseorang murid tidak boleh mengutamakan guru silat dan murid-murid seperguruannya sehingga mengabaikan hak dan kewajibannya kepada ibubapa, suami, isteri, anak dan ahli keluarga
- (b) Seseorang murid tidak boleh memandang rendah dan hina terhadap orang bukan daripada kalangan ahli silatnya
- (c) Seseorang murid yang beragama mesti menjalinkan ikatan persahabatan sama ada sesama ahli atau orang lain

3.7 Gerak Langkah

- (a) Gerak langkah silat tidak boleh dikaitkan dengan zat Allah dan sifat-sifatNya atau merupakan maksud di sebalik kalimah atau nama-nama Allah atau sifat-sifatNya
- (b) Gerak langkah silat tidak boleh dikaitkan sebagai maksud yang tersirat daripada diri atau jasad Rasulullah S.A.W para malaikat, nabi-nabi dan orang soleh
- (c) Gerak langkah silat tidak boleh dimaksudkan dengan perkara-perkara yang berkaitan dengan agama Islam atau perlakuan-perlakuan ibadat yang tertentu seperti dua kalimah syahadah dan sembahyang

3.8 Amalan Dalam Silat

- (a) Tidak boleh memuja dan memperhambakan diri kepada sesuatu kuasa atau peribadi yang boleh mendatangkan nasib baik atau buruk kepada seseorang seperti hantu, dewa, keramat, kubur, keris, busur dan sebagainya
- (b) Tidak boleh menggunakan tangkal dan azimat yang mengandungi rajah-rajah atau tulisan-tulisan yang tidak difahami, objek-objek tertentu dan bercampuraduk dengan ayat al-Quran
- (c) Tidak boleh mengamalkan bacaan-bacaan tertentu yang tidak difahami maknanya dikhuatiri mengandungi kata-kata pemujaan kepada berhala, iblis, syaitan atau nama berhala orang kafir serta bercampuraduk dengan ayat al-Quran

- (d) Tidak boleh meninggalkan ibadat wajib yang dituntut di dalam Islam seperti sembahyang lima waktu dan puasa di bulan Ramadan ketika melakukan amalan silat

3.9 Pengijazahan

- (a) Tidak boleh melakukan isyarat sembah atau gerak tubuh yang melambangkan ketundukan yang menyamai atau melebihi ketundukan yang hanya layak kepada Allah sahaja seperti tunduk sembah kepada guru
- (b) Tidak boleh melakukan upacara-upacara yang mengandungi unsur-unsur penyembahan, pemujaan, memohon bantuan atau memperhambakan diri kepada kuasa-kuasa atau tenaga-tenaga ghaib seperti mempersembahkan sedulang makanan, menyembelih ayam dan sebagainya

3.10 Matlamat Silat

- (a) Matlamat silat hendaklah matlamat yang baik seperti untuk kesihatan tubuh badan, mendisiplinkan diri, hidup bermasyarakat, untuk mempertahankan diri daripada bahaya dan sebagainya
- (b) Matlamat silat tidak boleh:
 - i. Untuk membalas dendam, menuntut bela, membuat aniaya, menakut-nakutkan dan mengugut orang lain
 - ii. Untuk menanam sifat berani yang keterlaluan sehingga hilang hormat kepada ibubapa, guru, ahli keluarga dan lain-lain
 - iii. Untuk memupuk sentimen perkauman atau taksub golongan/kumpulan ekstrim agama yang melampau di kalangan ahli

4 PENUTUP

Dengan mengikut garis panduan ini diharapkan para pengamal silat dan seni mempertahankan diri supaya dapat menghindarkan diri menyimpang daripada ajaran Islam yang benar, agar hidup sentiasa dirahmati Allah S.W.T

Garis Panduan

SIRI 2



GARIS
PANDUAN

**ORANG ISLAM
TURUT
MERAYAKAN
HARI KEBESARAN
AGAMA ORANG
BUKAN ISLAM**

Keputusan:

Muzakarah Jawatankuasa Fatwa Majlis Kebangsaan Bagi Hal Ehwal Agama Islam Malaysia Kali Ke-68 yang bersidang pada 12 Apr 2005 telah membincangkan Garis Panduan Orang Islam Turut Merayakan Hari Kebesaran Agama Orang Bukan Islam. Muzakrah telah memutuskan bahawa

Keputusan:

Dalam menentukan perayaan orang bukan Islam yang boleh dihadiri oleh orang Islam beberapa kriteria utama perlu dijadikan garis panduan supaya ia tidak bertentangan dengan ajaran Islam. Kriteria-kriteria tersebut adalah seperti berikut:

1. Majlis tersebut tidak disertakan dengan upacara-upacara yang bertentangan dengan akidah Islam. Maksud “bertentangan dengan akidah Islam” ialah sesuatu perkara, perbuatan atau keadaan yang jika dilakukan menyebabkan tercemarnya akidah umat Islam.

Contohnya;

- i. Menyertakan simbol-simbol agama seperti salib, memasang lampu lilin, pokok krismas dan sebagainya.
 - ii. Menyanyikan lagu-lagu bercirikan agama.
 - iii. Meletakkan apa-apa tanda bercirikan agama pada dahi, atau tanda-tanda lain pada anggota tubuh.
 - iv. Memberikan ucapan atau isyarat yang berbentuk pujian kepada agama orang bukan Islam.
 - v. Tunduk atau melakukan perbuatan seolah-olah menghormati upacara agama orang bukan Islam.
2. Majlis tersebut tidak disertakan dengan perbuatan yang bertentangan dengan syarak. Maksud “bertentangan dengan syarak” ialah sesuatu perkara, perbuatan, perkataan atau keadaan yang jika dilakukan akan bertentangan dengan ajaran Islam yang diamalkan oleh masyarakat Islam.

Contohnya:

- i. Memakai pakaian berwarna merah seperti santa claus atau pakaian lain yang melambangkan agama.
 - ii. Menghidangkan minuman atau makanan yang memabukkan dan seumpamanya.
 - iii. Mengadakan acara yang berunsur perjudian, penyembahan, pemujaan, khurafat dan sebagainya.
3. Majlis tersebut tidak disertakan dengan “perbuatan yang bercanggah dengan pembinaan akhlak dan budaya masyarakat Islam” di negara ini. Maksud “bercanggah dengan pembinaan akhlak dan budaya masyarakat Islam” ialah sesuatu perkara, perbuatan, perkataan atau keadaan yang jika kita dilakukan akan bertentangan dengan nilai norma kehidupan masyarakat Islam Negara ini yang berpegang kepada ajaran Islam berdasarkan Ahli Sunnah Wal Jammah.

Contohnya:

- i. Percampuran bebas tanpa batas dan adab sopan.
 - ii. Berpakaian yang menjolok mata.
 - iii. Mendengkan lagu-lagu yang mempunyai senikata berunsur lucah serta pemujaan.
 - iv. Mengadakan program seperti pertandingan ratu cantik, laga ayam dan sebagainya.
4. Majlis tersebut tidak disertakan dengan perbuatan yang boleh “menyentuh sensitiviti masyarakat Islam”. Maksud “menyentuh sensitiviti masyarakat Islam” ialah sesuatu perkara, perbuatan, perkataan atau keadaan yang jika dilakukan akan menyinggung perasaan umat Islam tentang kepercayaan dan amalan mereka

Contohnya:

- i. Ucapan–ucapan atau nyanyian berbentuk dakyah keagamaan bukan Islam.
- ii. Ucapan–ucapan yang menghina umat Islam.
- iii. Ucapan–ucapan yang menghina agama Islam.
- iv. Persembahan yang bertujuan mempersendakan pegangan agama masyarakat Islam.

5. Pihak penganjur dan orang ramai diminta mendapatkan pandangan pihak berkuasa agama sebelum menganjur atau menghadiri majlis perayaan orang bukan beragama Islam.



Diterbitkan oleh:

JABATAN MUFTI NEGERI PULAU PINANG

Tingkat 48, KOMTAR, 10000 Georgetown, Pulau Pinang.

Tel: 04-263 2975

Faks : 04-263 2985